



Jumat, 09 September 2022
Ogen: Masmur 37:3-6



Lakoken Si Mehulina



Engkai maka kita arus ngelakoken si mehuli? La gia erkiteken pegajaren agama? Erbahan mehuli e enggo jadi sada kewajiben tep-tep jelma. Apaika adi kita selaku kalak si erkiniteken, leben nggo sialoken kiniulin Dibata e man banta. Ngelakoken si mehuli i bas kinitekenta labo sada kearusen tapi enggo kin jadi biak/karakter si mendarah daging i bas kegeluhenta. Biak e pemere Dibata kin. Erkiteken Tuhan nggo erbahan si mehuli, maka kita pe erbahan si mehuli. Jadi erbahan si mehuli labo i nen arah manusia si lit i sekelewetta. Adi e si ban manusia jadi salah sada dasarna, turah me belas-belas ‘si lakokenlah si mehuli man kalak si tek saja, sideban la padah.’ Adi si A erban jahat man bangku, maka aku pe la padah erbahan si mehuli bana. Enda labo kinitekenta. Sabap Tuhan ngajarkensa man banta maka sekalak musuh/imbang arus si kelengi. Bagi Daud, i bas Masmur 37 enda, aminna pe lit kalak si jahat kempak ia, Daud la pernah mbalassa alu erbahan si jahat tapi alu kiniulin (asum Saul ngayak-ngayak Daud guna ibunuh, sekali jadi lit peluang Daud guna munuh Saul tapi la ilakokenna). Daud nurikensa maka la padah tembehi ras cimberu bana sabap nggo lit taktakna i bas Tuhan. Si pentingna ernalemlah man Tuhan dingen lakoken si mehulina, adi banci man kalak si jahat pe. Adi jumpa kita ras kalak si erbahan jahat banta, maka alu ngelakoken si mehuli, si arapken maka kalak si jahat e banci iubah Tuhan jadi kalak si mehuli. Kai kesulitenta guna jadi kalak si mehuli?

Megati erbhan mehuli e mberat si akap perbahan tempa la lit untungna man banta, erbahan mehuli e perlu lit pengorbanen subuk materi, waktu, tenaga ras perukuren. Tuhu erbahan mehuli eperlu perjuangan i bas pusuh. La ngarapken imbalan arah kai si ibahan kita, sabap si lit nge i bas kita maka banci sibereken. Kai si lit i bas kita e rehna i bas Dibata nari kap. Lit nge pengalamenta guna isaksiken maka alu ngelakoken si mehuli, lit perubahren si terjadi i bas kegeluhen kalak si deban?

Adalah baik menjadi orang penting, tetapi jauh lebih penting menjadi orang baik.